

Endenquimbo, diez de diciembre, 1948, nidaid abitedinoësh matses utsi-utsiec cho-chopanëdash, onquenuec.

Adec cho-choquid Naciones Unidas capec.

Choashic onquepanëdash. - Bëdamboec tabadnuna, quequin chuibanuna. Nuqui chuiboed dada uanuna.

Nuqui dada uaid daëdpen nacenashun meniac utsibo abitedishun nuqui chuiboed tantiatsiashe - quepanëdash cho-choquido. Ambi chiaid neid dada uaid nec.

Nidaid Abitedinoësh Cho-choquidon Bëdamboec Tabadte Chiaid

Utsi Chuinuen Naden chuinëdash

Adashic: - Bëdamboec tabadnuna, qesho: Ai, mimbi chiac padec tabadnuna, matses abitedimbo chuinanubi:

Mibi bëdamboec tabashobi cueschitono, quequid nibedtsiash. Cuesnanenquio matses ictsiash. Icsauanquid chushcatsiash. Bëdambocquid bëdamboen ispatsiash - quequin chuipanedash nidaid abitedinoësh cho-choquidon.

Adashic: - Enden: Bëdamboec tabadnu, qesho: Padi. Cueschitono, quequin icsamenëdaide nēbi utsi uanuna.

Naden chuinanuna. Mimbi tantiaide chuita. Utsibon chuisho tantiate bonquin tantiaata. Dacuëdenquiocquin nata. Mibi cuestiapimbo iquebi - quequin chuinanuna. Adec matses utsi-utsiquetsëcquiec nuquibi bëdamboec tabadtsiashe - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin neid chiaid isun chuiquid dapan: Ai, bëdamboen chiacpadec tabadnuna, aton matses chiac bëdambo ictsiash. Aid chuiquid dapa caic: Icsambo iqueque. Cuesunechitono, utsibon cac icsambo ictsiash - quequin chuipanëdash nidaid abitedinoësh cho-choquidon.

Adashic: - Nuquibi bëdambo iquec, cananuna - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin chiac bëdambo ictsiash. Matses abitedimbo bëdambo iquec. Dada

bëdambo iquec. Chido bëdambo iquec. Bacuëbo bëdambo iquec, quequin chiac bëdambo ictsiash. Padi.

Mimbi chiac padomboen bëdamboen nainda. Cueschitono quequid chieshëmënnquid icsambo ictsiash.

Adquid nibëdnubi matses abitedi dada uaquin mëquiacac bëdambo ictsiash. Adembidi dauë menebanac bëdambo ictsiash. Adecbidi piasenquio yec bëdamboec tabadac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nëmbo cho-choquidotedi aton nidaidën nishun aton matses nuqui chiondaid chuituidac: Ai, mimbi chiacpadec bëdamboec tabadnuna, quequin chiac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nuqui chuiboed matses abitedimbo tantiamiac bëdambo ictsiash - quepanëdash. Aidedba chuipanëdash.

Nuqui Chuiboed Bëdambo Iquec, Quiash

Nidaid abitedinoësh cho-choquido: - Nuqui chuiboed matses abitedimbo tantiamenuna. Tantiamiac chuiquid dapabon: Ai, adec bëdamboec tabadcuenuna, cac bëdambo ictsiash. Bëdamboec tabadcuenuna, cacpadec matses abitedi bëdamboec tabadac bëdambo ictsiash - quequin chuipanëdash nidaid abitedinoësh cho-choquidon.

Chiaid 1

Chidon tishaido yec matses abitedimbo bëdamboec isnanac bëdambo ictsiash. Chieshnanac icsambo ictsiash. Abitedimbo bëdamboec tabadac bëdambo ictsiash. Shubu abentsëcquidën tabadac birnboec abitedi tabadac bëdambo ictsiash - quequin chuipanëdash nidaid abitedinoësh cho-choquidon.

Chiaid 2.

Nëid dada uaid isash abitedi bëdamboec isnanac bëdambo ictsiash. Ėbi padquid con matsesuidtsëqui

bëdambo iquec. Matses utsibo icsarnbo iquec, quenquio yec: Con matses bëdambo icnuc utsibotsen bëdambo iquec, cac bëdambo ictsiash. Adernbidi: Embentsëqui bëdamboen tantiembi. Utsibo abitedishun icsamboen tantiec, quenquioëquin:

Chieshëenquiocquin ma ambi tantiaidi napanu cac bëdambo ictsiash. Chidobi bëdamboen istiapimbo iquebi, quenquiocquin chidotsen bëdamboen isac bëdambo ictsiash. Chuiquid dapambi nëid chiaid niacbidanquin aton matses chieshënac icsambo ictsiash - quequin chuipanëdash nidaid abitedinoësh cho-choquidon.

Chiaid 3.

Matses utsibo yuainquio yec, cuesnanenquio yec quec bëdamboec tabadnuna, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 4.

Matses utsibo min matsesbëta yuainquiocquid. Yuac icsambo ictsiash. Adembidi matses utsibo min matsesbëta beshun yuamequin menenquiocquid. Yuamenun meniac icsambo ictsiash - quequin chuipanëdash nidaid abitedinoësh cho-choquidon.

Chiaid 5.

Matsespenquio yacbimboecnuc aton matses bëta matses utsibo icsauainquiocquid. Icsauac icsambo ictsiash - quequin chuipanëdash nidaid abitedinoësh cho-choquidon.

Chiaid 6.

Atoda nidaidën nidacsho anocquidon: Con matses chuiquid dapan chiaid ley caid nata. Niacbidansho juez caidën ëbi yac padomboembidi cuidtsiash, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 7.

??Mitsicquid nidaidën tabadquid nec? Aton nidaidën tabadquido chuiquid dapan chiaid ley caid abitedishun nac bëdambo ictsiash. Aidën chiaid niacbidansho juez caidën cuidac bëdambo ictsiash. Nëid chiaid niacbidanquin matses utsi caic: Matsespenquio mibi nec. Mibi bëdamboen istiapimbo iquebique. Mëyanu, quequin ambembi nac icsambo ictsiash. Cuidte chuiquid juez caidën matses abitedimbo: Mibi matses nec. Con matses nacpadomboembidi mibi naimbi, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 8.

??Midacquid matses nepec? Aton nidaidën tabadquido chuiquid dapabon chiaid nac bëdambo ictsiash. Aid chiaid niacbidanquin utsibo icsauasho isun juez caidën bemeshun cuidac bëdambo ictsiash - quequin chuipanëdash nidaid abitedinoësh cho-choquidon.

Chiaid 9.

Nëid chiaid niacbidanquin ambembi matses quëne uac icsambo ictsiash. Adembidi ambembi chieshënquin matses aton nidaidënshun cuemiac icsambo ictsiash - quequin chuipanëdash nidaid abitedinoësh cho-choquidon.

Chiaid 10.

Chuiquid dapabon chiaid ley caid niacbidanosh. Icsaosh, caid beshun juez caid yacno buanquin. Anoshombi matses daëdpenshun isnuc juez caidën chieshënenquiocquin chuimequin. ??Atotsi nao? quequin chuimequin. Ashumbi aid isquidtsen chuimequin. Adoshombic: Abimbo caosh. Icsaosh, queshun cuidquin. Icsabicshobi: Icsabi iqueque. Cuidtiapimbo iquebi. Ma nidnu, cac bëdambo ictsiash. Cuidte chuiquid juez caidën chieshënenquiocquin abimbo cac bëdambo ictsiash - quequin chuipanëdash nidaid abitedinoësh cho-choquidon.

### Chiaid 11.

Chuiquid dapabon chiaid ley caid niacbidanosh. Icsaosh, caid beshun cuidte chuiquid juez caidën uesquin chuimiabi badedi: Mibi icsaque. Mibi cuidnu, cac icsambo ictsiash. Chata. Utsibon tantianubi chuimiabi icquin: Icsambo iquec, catiapimbo iquebi. Chuimebono, juezën cac bëdambo ictsiash.

Chuiquid dapabon chiaid ley caid niacbidanacsho juez caidën chuimeshun cuidac bëdambo ictsiash.

Chuiquid dapabon: Aden naic icsambo ictsiash. Adoquid naden cuidquid, quequin chiacmaid nacsho:

Icsambo iqueque. Cuidnu, cac icsambo ictsiash. Aidon chiaid niacabiesho cuidac icsambo ictsiash - quequin chuipanëdash nidaid abitedinoësh cho-choquidon.

### Chiaid 12.

Nidaid utsin-utsinquetsëcquiecquidën chuiquid dapabon: Nadquid icsambo iqueque. Cuidnu cac bëdambo ictsiash. Nëidic: Mimbi tantiaidi nainda. Embi chiac padomboenuidtsëqui nata, quec chieshëmënnquid.

Nëidic: Min nabobëdi bëdamboec tabadenda, quec chieshanquiecquid. Nëidic: Ambi tantiaidën iste dada uaid isnushe. Beshun secanuna, quequin dada uaido beshumënnquid. Aidted icsambo iquec, quequin chuiquid dapabon chiac bëdambo ictsiash - quequin chuipanëdash nidaid abitedinoësh cho-choquidon.

### Chiaid 13.

Nidaid utsin-utsinquetsëcquiecquidën chuiquid dapabon nadoac bëdambo ictsiash. Nëid nidaidën tabadquid: Capucuenenu, qesho tantiashun: Ai, capucueneta, cac bëdambo ictsiash. Adembidi: Shubu utsin manëdnu, qesho: Ai manëdta, cac bëdambo ictsiash, quequin chiac bëdambo ictsiash.

Nadembidi chiac bëdambo ictsiash. Nëid nidaidënoësh nidendabi, qesho, Ai, nidta, cac bëdambo ictsiash.

Nidenda. Cueschitono, shëpi, cac icsambo ictsiash. Padnuen: Nëid nidaidën choaindabi, qesho, Ai, chota, cac bëdambo ictsiash. Padnuen: Choenda. Cueschitono, cac icsambo ictsiash - quequin chuipanëdash nidaid abitedinoësh cho-choquidon.

#### Chiaid 14.

Nidaid utsino cuenash: Con nidaidën tabadquidën ambembi chiesënac cuenobique. Min nidaidën tabadnu, queshe: Ai, nēmbobi quenenta, cac bēdambo ictsiash.

Padnuen aton matses chuiquid dapabon ley chiaid niacbidanec: Cuidnushe, quianec nidaid utsin cuensho: Ai, nēmbi quenenta, cac icsambo ictsiash. Adembidi ėmbi chuiboed niacbidanec: Cuidnushe, quianec nidaid utsin cuensho: Ai, nēmbi quenenta, cac icsambo ictsiash - quequin chuipanēdash nidaid abitedinoēsh cho-choquidon.

#### Chiaid 15.

Acte amē ėquē cuēma utsiuc tabadquid: Peruano nebi, queshe Peru yacnocquid ėhuiquid dapan: Ai, Peruano mibi nec, cac bēdambo ictsiash. Padnuen acte amē oquē cuēma utsiucquid: Brasileiro nebi, queshe Brasil yacnocquid chuiquid dapan: Ai, Brasileiro mibi nec, cac bēdambo ictsiash. Padnuen nidaid utsin tabadquid: Nēid nidaidën icquidquo nebi, queshe: Ai, adquid mibi nec, cac bēdambo ictsiash.

Aton nidaidën tabadquid: Nēid nidaidën icquid mibi catiapimbo iquebi. Con matses mibi cainqujo iquembi, ambembi cac icsambo ictsiash. Padnuen aton nidaidën tabadquid: Nēid nidaidën icquid icboedi nēbi nidaid utsin manēdash aid nidaidën icquid yanebi, queshe ambembi chieshēnquin: Padi. Aid nidaidën icquid mibi catiapimbo iquebi, cac icsambo ictsiash - quequin chuipanēdash nidaid abitedinoēsh cho-choquidon.

#### Chiaid 16.

Ashumbic padpiden: - Dada caniaidi: Con bacuē tishmenuen con matsesën champi bednu, queshe: Ai, adota, cac bēdambo ictsiash. Caniaid utsibi: Con bacuē tishmenuen matses utsin champi bednu, queshe: Ai, adota, cac bēdambo ictsiash. Padnuen chido caniaid: Con bacuē tishnuen con matses bedmenu, queshe: Ai, adota, cac bēdambo ictsiash. Chido canjaid utsibi: Con bacuē tishnuen matses utsibi bedmenu, queshe: Ai, adota, cac bēdambo ictsiash. Dadabi: Con chidobēdi bēdamboec tabadnu, queshe: Ai, adta, cac bēdambo ictsiash.

Chidobi: Con bënëbëdi bëdamboec tabadnu, qesho: Ai, adta, cac bëdambo ictsiash. Chido aton bënë yuapenquio nec. Dadabi: Embi con chido caboedi icsasho isun con chidopenquio canu, qesho, Ai, adota, cac bëdambo ictsiash. Chidobi: Embi con bënë caboedën chieshënoshi. Aidi nianu, qesho, Ai, adota, cac bëdambo ictsiash.

Nidaid utsin-utsinquetsëcquiequidën chuiquid dapabon: Dadabi: Aton bënë ictiapimbo iquebi, qesho bedmenda. Adecbidi chidobi: Aton chido ictiapimbo iquebi, qesho bedmenda. Padnuen dadan: Mibi bednu, cac: Ai, ëbi bed, cac bëdambo ictsiash.

Nidaid utsin-utsinquetsëcquiequidën chuiquid dapabon: Dada aton nabobëdi bëdamboec tabasho isash: Bëdambo iquec, cac bëdambo ictsiash. Chieshëmënuquidën aton chido beshunac icsambo ictsiash. Adembidi aton bacuëbo beshunac icsambo ictsiash. Adoquid cuidnuna, quequin chiac bëdambo ictsiash - quequin chuipanëdash nidaid abitedinoësh cho-choquidon.

Chiaid 17.

Nidaid utsin-utsinquetsëcquiequidën chuiquid dapabon: Amplabicquid: Con nabi nec, qesho: Ai, mitsa na nec, cac bëdambo ictsiash. Adembidi: Utsin nabëdi con na nec, qesho: Ai utsin nabëd mitsa na nec, cac bëdambo ictsiash.

Adashic: Ancanquidën utsin na beshunac icsambo iquec. Adembidi utsin na ampiac icsambo iquec, quequin chiac bëdambo ictsiash - quequin chuipanëdash nidaid abitedinoësh cho-choquidon.

Chiaid 18.

Nidaid utsin-utsinquetsëcquiequidën chuiquid dapabon: Nëmbocquid: Aden tantiembi, qesho: Aden tantisho mibi cuesunechitono, shëpi, cac icsambo ictsiash. Utsibi: Matses uaquid abentsëqui Nuquin Papa iquec, qesho: Adquid cuesunechitono, shëpi, cac icsambo ictsiash. Utsibi: Nuquin Papa caid nibëdec, qesho: Adquid cuesunechitono, shëpi, cac icsambo ictsiash. Utsibi: Podobitsi daëdpën tantiaquidquo nebi,

quesho: Adquid cunesuchitono, shēpi, cac icsambo ictsiash. Padnuen: Podobitsi daēdpen tantiaquid  
icboedēmbi nēbi utsi uaimbi. Nēbi Nuquin Papa tantiaquid nebi, quesho: Adquid cunesuchitono, shēpi, cac  
icsambo ictsiash. Utsibi: Embi Nuquin Papa caid tantianuec shubun puduedash tabadcuēdednu, quesho: Padi,  
cuesun secachitono, cac icsambo ictsiash. Utsibi: Embi Nuquin Papa caid tantianuec abentsēqui tsadnu,  
quesho: Padi. Cunesuchitono, cac icsambo ictsiash. Padnuen: Embi Nuquin Papa caid utsibo chuibanu,  
quesho: Asho mibi cunesuchitono, cac icsambo ictsiash. Utsibi: Embi Nuquin Papa caid tantianuen nanu,  
quesho: shēpi cac icsambo ictsiash, quequin chiac bēdambo ictsiash - quequin chuipanēdash nidaid  
abitedinoēsh cho-choquidon.

#### Chiaid 19.

Nidaid utsinutsinquetsēcquiequidēn chuiquid dapabon: Matsesēn ambibi tantiaid chuisho: Chuisho  
cuesuchitono, shēpi. Chēn, cac icsambo ictsiash. Utsibi: Utsin chuisho tantiatanu, quesho: Nisho isun mibi  
cunesuchitono, shēpi. Chēn, cac icsambo ictsiash. Padnuen: Maquinian onquequin utsibo chuibanu, quesho:  
Chēn. Cuidchitono, cac icsambo ictsiash. Utsibon iste dada uanu, quesho: Chēn. Dada uaina, cac icsambo  
ictsiash. Nidaid utsin tabadquid chuinu, quesho: Chēn. Anocquido chienda, cac icsambo ictsiash, quequin  
chiac bēdambo ictsiash - quequin chuipanēdash nidaid abitedinoēsh cho-choquidon.

#### Chiaid 20

Nidaid utsin-utsinquetsēcquiequidēn chuiquid dapabon: Con nidaidēn tabadquid: Aidobēdi bēdamboec  
tabadnu, quesho: Ai, adta, cac bēdambo ictsiash. Adembidi: Shubun tsaduedash bēdamboec onquecuēdednu,  
quesho: Chēn. Cuidchitono, cac icsambo ictsiash.

Adashic: Utsibi: Aden tantiaquidobēd tabadtiapimbo iquebi, quesho: Baded cho. Choenquiocsho  
cuidchitono, cac icsambo ictsiash, quequin chiac bēdambo ictsiash, - quequin chuipanēdash nidaid  
abitedinoēsh cho-choquidon.



Chiaid 21.

Nidaid utsin-utsinquetsēcquieccquidēn chuiquid dapabon: Miqui chuiquid ictiadquio iquebi, queshe aton matsesēn: Ai, ēbi chuiquid icta, casho utsibo daēdpatsēcshun: Padi, cuesunechitono, shēpi, cac icsambo ictsiash. Padnuen: Miqui chuiquid ictiadquio iquebi, queshe aton matsesēn: Padi caqui chieshēnquin: Padi, caquido cuesun secachitono cac icsambo ictsiash.

Chuiquid dapabon: Nuquin matses abitedi nashununa. Aton podquedēn uaquinc, aton dauēchoquid icmequinc, aton dada uaid ismequid icmequinc canuna, cac bēdambo ictsiash.

Matses daēdpenshun: Embi chuiquid icta, cac aidi chuiquid icmiac bēdambo ictsiash Padabi yac icsambo ictsiash. Utsibombi: Aidi chuiquid bēdambo ictsiash, quequin utsibo ismenquiocquin aid cuēmēdquid dada uashun sandoquin. Adoshombi matses abitedishun ambi tantiaid dada uatanquin sandoacsho sandoaid beshun tambanquin. Adoshombic: Mibi cuēmēdquid matses daēdpenshun dada uaque. E'bi chuiquid icta, cain. Padnubi matses utsibon aton matsesēn nac padomboen chuiquid dapa icmequin. Adoac bēdambo ictsiash - quequin chuipanēdash nidaid abitedinoēsh cho-choquidon.

Chiaid 22.

Matses abitedi bēdamboec tabadac bēdambo ictsiash. Piasenquio yec dacuēdenquio yec tabadac bēdambo ictsiash. Nēid nidaidēn icquido chuiquido nidaid utsin icquidobētan chuiquin: Matses utsi-utsiec abitedimbo bēdambo iquec. Aton piucquid bedmenuna. Bēdamboec tabadmenuna. Min matsesi bēdamboen istiapimbo iquebi, cainquio icnuna, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 23.

Nidaid utsinquetsēcquieccquidēn chuiquid dapabon: Nuquin nidaidēn tabadquido: Chuiquid dapan chiaid ley caid niacbidanenquiocquin piucquid bednuen naimbi, queshe: Ai, adota, cac bēdambo ictsiash. Padnuen piucquid bednuen nashunaidon: Chata. Tiboeta. Miqui mēyadeque, abi nashunquido cac bēdambo ictsiash.

Chonoaoanquidquo icsambo ictsiash. Utsibi: Piucquid benuen naimbi, cac: Naic cho, caquid nibëdsho isun chuiquid dapan: Nanu, cauidquido piucquid meniac bëdambo ictsiash.

Padnuen: Naic cho, cac daëdpen chonoadacsho piucquid menequin. Chonoadquido abitedishun tauac padquido aidtedishun nainacsho piucquid ated-atedbidi menebaniac bëdambo ictsiash.

Ma aton nabo pemequinc, dasiuiquinc, shubu uaquinc canu, quequin chieshenquiocquin chonoadquid piucquid daëdpen meniac bëdambo ictsiash. Piucquid daëdpatsëc meniac aton nabo pistsëc pemequinc, disiuienquiocquinc, shubu uatsëcquinc cac icsambo ictsiash. Adec icsambocsho isun chuiquid dapan: Piucquid menenuna, cac bëdambo ictsiash.

Chonoadquido: Ebi chonoadac padec chonoadquidobëd onquecuedednuna. Ëbi chonoaoaquidon piucquid daëdpatsëc menesho chushcanuna, qesho: Chën. Onquecuededenda. Cuidchitono, cac icsambo ictsiash. Ai, miqui chiac padota, cac bëdambo ictsiash - quequin chuipanëdash nidaid abi tedinoësh cho-choquidon.

Chiaid 24.

Tibocamianenquiocquin chonoaoanquiac icsambo ictsiash. Padnuen: Padi. Nëbadiadash tiboenuna, cac bëdambo ictsiash. Dia ëeriado caidën matses abitedi tiboequid. Asho Chonoaoaquidën dia ëeriado caic: Aid ushëmbi chonoadac bimboecnuc adted piucquid menenu, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 25.

Aton pete icnuc, aton dashcute icnuc, aton shubu icnuc, aton dauë icnuc aton nabobëdi matses bëdamboec tabadtsiash. Adac bëdambo ictsiash. Utsibi chonoadtiapimbo icquin aton piucquid bedtiapimbo yec bëdamboec tabadtiapimbo iquec. Nëidtedi matses chonoadtiapimbocquido nec. Nëidic Naid cho, cacmaido. Nëidic dada icsatsaido. Nëidic niantebo. Nëidic tsusiompibo. Nëidic machompibo. Aidtedi chonoadtiapimbocsho isun chuiquid dapan aton piucquid meniac bëdambo ictsiash.

Ani aton bacuëbobëd tabadquido bēdamboen isquin bēdamboen dayun uac bēdambo ictsiash. Bēnēn tishmiaido bacuëbo bēdamboen isquinc abembi uaidēn tishaidotsen bēdamboen isquinc cac bēdambo ictsiash - quequin chuipanēdash nidaid abitedinoësh cho-choquidon.

Chiaid 26.

Nidaid utsin-utsinquetsēcquiequidēn chuiquid dapabon: Con matses dada uate shubun puduedash mēquiadnu, qesho: Ai, adta, cac bēdambo ictsiash. Taëyec mēquiadquid dada uate shubun puduedacsho: E'~mbi mibi mēquiacsho ëbi piucquid mene, cac icsambo ictsiash. Yuecash mēquiadquidēn mēquiacquid piucquiud meniac bēdambo ictsiash. Bacuëbo abitedi dada uaquin mēquiacnuna, cac bēdambo ictsiash. Dada uaic bēdamboec mēquiadash: Dada uaid daēdpenquo tantiatiaquio iquebi. Dada uate shubu utsin puduednu, qesho: Ai, adta, cac bēdambo ictsiash. Utsibi nacnenec mēquiadash: Nacnenquidēnquo ismesho istanu, qesho: Ai, adota, cac bēdambo ictsiash.

Dada uate shubun puduedshun mēquiacquidon: Matses utsi-utsinquetsēcquie iquec. Abitedimbo bēdambo iquec. Utsibo abitedi bēdamboen isnuna. Chieshnanenquo yec cunesun secananenquo icnuna. Adec bēdamboec tabadnuna - quequin mēquiadquido bēdamboen chiac bēdambo ictsiash.

Amëbëtan anin: Nēid dada uate shubunoshon ~ëquiacquidēn ëmbi tantiaidbidi chioshe. Ambo con bacuëbo yuednu, qesho: Ai mimbi chiac padota, cac bēdambo ictsiash - quequin chuipanēdash nidaid abitedinoësh cho-choquidon.

Chiaid 27.

Con matses cuëdēnacno istanu, qesho: Ai, mimbi chiac padota, cac bēdambo ictsiash. Utsibi: Con matses mamēnacno istanu, qesho: Chēn. Cuidchitono, cac icsambo ictsiash. Utsibi: Con matsesēn nacnenaid istanu, qesho: Ai, adotanta, cac bēdambo ictsiash. Utsibi: Con matsesēn nacnenaid bednu, qesho: Chēn, mibipadquid bedmetiapimbo iquebique, cac icsambo ictsiash.

Dada uaquido nacnenquidobēta bēdamboen isac bēdambo ictsiash. Utsibombi ambi tantiaid dada uaquid.

Utsibombi ambi tantiaid nacnenquid. Adoquidon: Embi nacnenaid bednuen ēbi piucquid mene, queshe bedquin piucquid meniac bēdambo ictsiash. Padnuen utsin dada uaidi caic muaquido: Embimbo dada uaid nec, queshe chuiquidēn cuidac bēdambo ictsiash. Muaquid utsibi: Embibo nacnenaid nec, queshe adembidi chuiquidēn cuidac bēdambo ictsiash - quequin chuipanēdash nidaid abitedinoēsh cho-choquidon.

Chiaid 28.

Nidaid abichobi icquidēn tabadquido chieshnanenquio yec bēdamboec tabadac bēdambo ictsiash. Matses aton matses utsibobēdi chieshnanac icsambo ictsiash. - quequin chuipanēdash nidaid abitedinoēsh cho-choquidon.

Chiaid 29.

Nidaid utsin-utsinquetsēcquiequidēn chuiquid dapabon: Min shubu yacno bēdamboec tabadtiadquio yec bēdamboec nashunanta, cac bēdambo ictsiash.

Chuiquid dapabon aton matses bēdamboec tabadte bonquin chiaid aton matsesēn nac bēdambo ictsiash.

Chuiquid dapabon aton matses mēyante bonquin chiaid aton matsesēn niacacsho cuidac icsambo ictsiash.

Embi chuiboed isun: Bēdamboec tabadnuna, cac bēdambo ictsiash. Padnuen ēmbi chuiboed ismeshun: Embi naiduidi nanu, shēpi, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 30.

Nēid dada uaid isash, Icsa uanquionona, cac icsambo ictsiash. Padnuen nēid dada uaid isun, Nidaid abichobi icquidēn tabadquidobēdi bēdamboec isanec bēdamboec tabadnuna, cac bēdambo ictsiash - quequin chuipanēdash nidaid abitedinoēsh cho-choquidon.